




Zuzlapulfa Boogie



Idiom: Gherdëina
Meludia: Luca Langgartner
Paroles: Marc Senoner

Son iust levà y ora de liet,
ncuei sons gasà, perchël ora cun l piet.
Ciociul da gusté y de chël na mesëina,
y da pandalanuef ega de vita chëla mëina.
Tré sëura l gurmel y dal ujin a rubé reves,
la tleves de auto ti tiri te ban' dal' eves.
Ie son Bin Ladin, terorist alpin,
sciche chëi dl Bel Mei vedi a suné dal ujin
"driiiiiin" y po me n mucì,
malan y si vedla, é perdù i zochi dla Gucci.
Sën me sautel do cun la forcia y la zapa,
"Chisc vadiet de muli n'à for una, co t'sà pa?"
Dut rabiëus me dijel: "Du Holzkopf, fliag o!"
Cie uel pa ch'sc pirner? Ie cumande tlo.

Zuzlapulfa zuzlapulfa zuzlapulfa Boogie
Zuzlapulfa zuzlapulfa zuzlapulfa Boogie

La ciampanes bat la dodesc, mi Schatzi me chërda,
ncuei ie San Valentin, la va de mëter a verda.
L ann passà cun i spinacians ne fovela nia cuntënta,
da iló cun l sfënder lënia ei abù feter la stënta.
Jì a uet dut l ann sciche na cudria d'instà,
vedl mut ne devënti pa y perchël ti ei scincà
n bon per fé wellness sa mont sun pastura,

a giavé n pue' canal - chël ie pu sciche na cura.
N Day-SPA ti sà, chël m'ei mpensà y chël ti ei dat,
ma dan muever ti acusi che te cason ne iel degun Jacuzzi.
"I will auf die Malediven", per mucé n pue' dal frëit.
"Crëia pa pu che n arnegà ie mort da sëit",
chi sta pa pra lift, chi va pa a vejelé?
Dai Schatzi su l moral y cianta cun mé.

Zuzlapulfa zuzlapulfa zuzlapulfa Boogie
Zuzlapulfa zuzlapulfa zuzlapulfa Boogie

Ch'sta mujiga scotes su canche te fleles la blava
o canche te ves a lauré la cianapia da l'ava,
canche te cumpëides la violetes do avëi stlù baraca,
o canche n sada sëira n bel colp te garata,
canche l paredlan a chël dl ujin ses che t'l es plu lonch,
canche te posses jì cun i tac sun furcela de Saslonch.
Ch'sta mujiga scotes su ntan che te amoles i scarpiei,
y ntan che te ves a spaz y vëijes che i prei ne ie nia siei,
y canche te vëijes che ie seniëures plu nèt nia n' se vega,
canche i ne uel nia plu spumante, mé plu n'ega, n'ega, n'ega,
canche te vën la gotes ajache te muesses paië la chëutes,
canche te vën la gotes ajache la montes vën mëutes.
Ch'sta mujiga scotes su ntan che te taches su la besc,
canche tl castl dai mandli diji che tl mond iel sën pesc.

Duc chëi che ie tlo: Zuzlapulfa Boogie
Jì a tré zedules: Zuzlapulfa Boogie
Tone y la condla dal lat: Zuzlapulfa Boogie
Maestri de schi: Zuzlapulfa Boogie
Christl dai cosi: Zuzlapulfa Boogie
L lëuf y la lores: Zuzlapulfa Boogie
Ziplamadones: Zuzlapulfa Boogie
Anda Malia da Cudan: Zuzlapulfa Boogie
Sexy Luciano: Zuzlapulfa Boogie
Chëi dla Fabrik: Zuzlapulfa Boogie
La smueia da Insom: Zuzlapulfa Boogie
UNESCO: Zuzlapulfa Boogie
L troi paian: Zuzlapulfa Boogie
Paul Grohmann: Zuzlapulfa Boogie
Bon di y bon ann: Zuzlapulfa Boogie
Marcià de Segra Sacun: Zuzlapulfa Boogie
I giac dala nëif: Zuzlapulfa Boogie

Flaco: Zuzlapulfa Boogie
Panda la 9: Zuzlapulfa Boogie